

文節公奏議
中

陸文節公奏議

卷三

續籌海運未盡事宜摺

奏爲海運未盡事宜續經籌議恭摺奏祈聖鑒事
十七年蘇松太三屬漕白糧米全由海運疊經臣等會議章程奏奉諭旨飭部議覆在案茲查常年河運及道光六年海運成案臣等忝酌其間尙有應須議奏者謹列爲三條恭呈御覽一海運漕白糧米天津斛收最關緊要前准倉場侍郎咨會奏明上屆用存木斛僅餘十五隻應照式添造八十五隻等因又准直隸督臣咨上年驗收江浙商運米石係用市斛每米一石比較漕斛計多三升四合等語伏思收買商米事同貿易可以市斛量兌若漕糧征自民間本用漕斛卽向

來河運抵通以洪斛交納仍折算漕斛報銷道光六年海運亦係照此辦理此次未便歧異轉致商船賠累查天津府庫舊存部頒鐵斗向爲豫東小米較斛之用臣等現飭各屬自備漕斛用上海縣庫鐵斛較準由監兌委員驗明印烙加粘印花給沙船帶赴天津並將部頒鐵斗隨同委員解往以便與天津鐵斗倉塲木斛呈請驗米大臣督同較驗用昭畫一

一白糧一項與漕糧不同疊奉諭旨尤應普律乾潔惟由津赴通剝運亦須加倍慎重查常年河運白糧厯由旗丁自雇民剝運通現在官剝船隻滿料日久挑存無多恐不敷用此次海運白糧計共五萬二千餘石擬俟運通時卽全數雇用民剝以示區別而重正供一各船樣米原以備收兌時考較之資上年商捐各米援照道光六年成案製備木桶盛貯赴

津及船到後啟視木桶米色受淹轉不足爲查驗比對之據
伏思常年河運白糧均用麻袋裝貯在途數月並無變動此
次海運樣米擬卽仿照白糧辦法以麻袋裝貯粘貼印花交
沙船自行攜帶俟到津日由江蘇委員呈送驗米大臣查對
以昭核實以上三條臣等公同商酌意見相同除分咨外理
合恭摺會奏伏乞皇上聖鑒謹奏道光二十八年正月二十
日奉硃批戶部知道欽此

李星沅等請海運各沙船援照成案准其免稅片

再海運載米各沙船援照道光六年章程八成載米二成載
貨准其免稅以示體卹前經臣等於籌議條款案內會摺奏
明在案本年二月內接准直隸督臣咨開據天津道等會詳
稱沙船所帶貨物應照時估通盤核價如止二成者仍准免

稅若價在二成以上卽照例納稅等因當經轉行遵照去後
今據蘇松太道等稟稱向來沙船裝貨北上以棉花布疋等
物爲大宗赴關東者十之七八赴天津者十之二三今承運
漕糧迂道至津准帶二成貨物並非全在天津銷售若將貨
與米石通盤計價不論何處銷售一概責令在津報稅是米
一石市價不過二兩以棉花布疋之價與米比較不啻倍蓰
非特不能體卹轉滋苦累因而已開之船逗遛不進未開之
船多裹足稟請核辦前來臣覆查道光六年成案商船二成
載貨由海關查明免稅計數請豁稅額係裝米千石准帶貨
二百石論石而不論價若照時估物價分別成數則貴賤懸
殊商船難免賠累該道所稟委係實在情形似應仍照道光
六年舊章以石計算不論價值高低如有二成以外之貨在

津銷售則在津納稅在關東銷售則在關東納稅以資體卹而免偏枯除飭該道等給發護照並分別咨行外理合附片陳明伏乞皇上聖鑒謹奏道光二十八年三月初十日奉硃批戶部知道欽此

奏報海關夷稅關期屆滿摺

奏爲江海關征收西洋各國稅鈔並內地絲商補納稅銀已屆關期報滿恭摺奏祈聖鑒事竊准部咨上海等四關開市後所征西洋各國稅銀應與粵海關同以道光二十四年正月二十五日截數嗣後連閏扣足十二個月爲該關報滿之期毋庸再挪甲乙以免混淆又內地客商販運湖絲赴上海口岸與西洋各國交易應查明赴粵程途補納各關稅銀又各關期滿奏報之先責成巡撫核實查驗各等因行令遵照

在案茲據委管江海關事蘇松太道咸齡詳稱江海關與西洋各國通商自道光二十六年十二月二十六日起至二十七年十二月二十五日止一年關期屆滿征收稅鈔銀六十二萬八千二百七十四兩二分一釐並代征內地商人補納杭關韶關贛關絲稅正銀四萬七千二百九十一兩九錢六分加一耗銀四千七百二十九兩二錢九釐除將批解動支各款分晰造冊循例請咨考核外將實存銀兩造具款冊詳請盤驗等情經臣札委松江府知府陳廷璜前赴該關按冊盤驗去後旋據驗明所征鈔稅等銀除寄存藩庫及支解各款外餘俱實存關庫委無徵多報少情弊出具切結呈送核奏前來臣覆加查核該關征收西洋各國稅鈔及內地絲商補納三關稅銀共計六十八萬二百九十五兩一錢九分內

除寄存及支解外其餘銀兩現經盤驗明確均係實存關庫
尙無征多報少情弊除飭妥爲封貯按季解部一面查明動
存細數造冊詳咨外理合會同兩江總督臣李星沅恭摺具
奏伏乞皇上聖鑒至該關征收夷稅未定正額盈餘現係統
作一條編征儘收儘報合併陳明謹奏道光二十八年三月
初一日奉硃批戶部知道欽此

奏報海運漕糧全數兌竣一律放洋摺

奏爲恭報海運漕糧全數兌竣跟接前幫一律放洋謹再由
驛馳奏仰祈聖鑒事竊照本年蘇松太三府州屬漕白糧米
全由海運截至二月二十三日共兌交倉正耗米一百餘萬
石業經先後奏報在案茲臣陸建瀛親赴上海督催據該局
員等詳報截至二月三十日止未兌尾數全行兌裝完竣合

計連前斛兌實在交倉漕白正耗籌補等米一百八萬三千一百十五石零共裝沙船八百五十一隻其應給沙船水腳等項照案給發清楚飭令各船趕緊一律開行聯幫放洋北上等情伏查沙船放洋全仗風色現值天氣晴和如果南風順利船行可期穩速除由署蘇松鎮總兵田浩然等督率將備駕船在於洋面往來梭巡臣等仍咨會署提督來英親駐十墩督飭師船護送出境以壯聲威而資妥速一面飛咨本省鄰省沿海各鎮營嚴密巡護並咨部查核外合將海運米石全數兌竣一律放洋緣由謹照案會同漕運總督臣楊殿邦恭摺由駙馳奏伏乞皇上聖鑒再米已運竣上海無事臣陸建瀛卽日回省合併陳明謹奏道光二十八年三月初十日奉硃批知道了欽此

李星沅等陳明收買餘米交兌情形片

再本年海運蘇松太三屬漕白二糧及彌補鎮江府屬緩徵漕糧共米一百八萬餘石裝船八百五十一隻陸續開洋北上節經臣等會奏並將任合利金詠盛二船或因鄰船碰損或因擊盜撞傷米石均已潮涇飭令委員淮揚道查文經等就近在天津收買餘米補額交兌此外如查有損失一體照辦附片具陳在案茲據天津稟報截至五月初三日止沙船進口共八百一十八隻計米一百三萬九千餘石遙檔未到尾船當亦接踵而至惟海洋行駛參差遲早不定現屆五月中旬河運南糧將次到津未便因守候海運尾數致令剝船擁擠查沙船本屬殷戶前此雇募之時先經議定如大幫抵津尚有零星船隻未到者卽由委員在津收買餘米交兌一

面飭知該船戶在蘇繳價還雇目下未到米數覈計無多擬
卽飛飭該道等查明實在數目遵照臣等前札籌買餘米交
兌卽使餘船續到亦可令其自行變價不致苦累至前准浙
省先後咨稱截回彭元驤彭又祥米船二隻暨被盜擄至該
省南魚山下彭福延郁隆駿高裕順米船三隻統共米五千
餘石疊經臣等派委師船駛赴浙洋交界處所迎護迄未過
北應飭該委員等一併籌買呈交總期天庾正供顆粒無虧
仍咨浙江撫臣嚴飭該省水師迅速緝獲賊盜另行覈辦所
有臣等現辦緣由除咨驗米大臣戶部倉場外是否有當謹
附片陳明伏乞皇上聖鑒訓示謹奏道光二十八年六月初

一日

酌籌整飭外海水師章程摺

奏爲酌籌整飭外海水師章程恭摺奏祈聖鑒事竊臣等前因江蘇水師廢弛洋面盜劫頻聞臚列情形據實陳奏欽奉上諭著沿海各督撫各飭水師將弁不分畛域認真兜截不得稍留餘孽至該督等奏稱水師廢弛原設營制未能盡善現在整飭水師嚴緝洋盜另議章程務當通盤籌畫于連界分捕合捕之處悉心妥議總期責有攸歸漸著成效等因欽此臣等伏查水師出洋首重船隻江蘇外海九營所轄洋面遼濶向止船船十二隻臣等先務爲急現議勸諭紳商捐造添補應用另摺具奏惟船備而鎮將不力弊仍與無船等而鎮將之所以得力又在湔除積習鼓舞新機當因者因當革者革調度固需臨事巡緝亟應預籌臣等體察情形悉心妥議謹擬言之必可行者約舉數端敬爲我皇上陳之一人才

宜磨勵也江蘇風氣柔弱水師尤難得人近年洋盜未清從
不聞兵船在洋接仗之事經臣等疊次指叅庸劣不堪之鎮
將分別革職枷號並派文職大員督辦各營始知儆畏勉力
出洋而昏暈嘔吐無狀不備又經汰其已甚獎其稍可革除
陸名兵目專從水務取材數月以來略有起色如署叅將劉
長清遊擊黃登第等先後擊沉盜船擒獲盜犯救回被劫商
船皆近來所未有惟全材甚不易得要必舍短取長明定賞
罰優者破格示獎劣者加等示懲駕馭而鞭策之令其知感
知奮一營巡宜變通也蘇松福山兩鎮同爲外海水師而蘇
松鎮常年統巡外洋秋冬兼巡內洋福山鎮僅止春夏統巡
內洋秋季會哨一次未免勞逸懸殊應從道光二十九年正
月爲始蘇松鎮春秋統巡外洋夏冬統巡內洋福山鎮夏冬

統巡外洋春秋統巡內洋狼山鎮本係陸路總兵統巡有名
無實其輪巡外洋官兵應聽蘇松福山兩鎮調度考核並南
匯營都司守備應與蘇松鎮標中營等六營一體輪巡外洋
以資練習一會哨宜核實也定例蘇松鎮總兵與浙江定海
鎮總兵又蘇松狼山福山三鎮總兵及各營將官按期互相
爲哨立法未始不善近年則該陣將均止派弁由陸路取結
呈報彼此並未謀面遇有盜案懦者懵然不知黠者藉詞推
諉實爲水師大弊節經臣等咨會浙江撫臣並通飭江蘇鎮
將必須親往巡哨一遇盜船相機兜截另派幹練委員輪駐
海口明查暗防如再虛應故事立即密稟核叅徇隱同罪一
堵緝宜扼要也現查江蘇外洋佘山最爲喫緊臣等遴委叅
遊一員帶領兵船在彼寄碇按季更換如值該員巡洋之期

卽作爲過班遞推派調其統巡之總兵除隨時遊巡外常年
寄旋崇明縣之黑沙嘴稽查策應倘仍收泊內港一經委員
查出嚴叅枷號示衆一配兵宜足數也原定船船一隻大舢
板船一隻各配兵四十名小舢板船一隻配兵二十名棲宿
時形擁擠偶值追逐洋盜技勇亦頗難施以致派不足數臣
等自上年冬間廉得其弊核定大舢船配兵三十六名大舢
板船配兵二十四名小舢板船配兵十六名無論內河外海
一律照派試行尙覺相宜嗣後舊有船隻應卽照此派調仍
俟新造加寬加長之船工竣再行酌辦他如沿海接濟必先
杜絕而後盜糧無可資下海私船必先查禁而後盜蹤無可
假以及海口人戶俱照內地編查保甲藉清勾結而免窩藏
一切應行事宜屢經臣等照案諄切通飭無庸另議更張至

海洋捕盜之方誠如訓諭必以不分畛域認真兜拿爲上策而畛域各存意見非獨鄰省難於兼顧卽本省界限亦有專司幾至牢不可破此次通盤籌畫本省鄰省總期一力巡防聲勢聯絡分捕合捕責有攸歸守之以嚴行之以實不敢侈言成效尤不敢稍襲虛文以冀仰副聖主綏靖海疆之至意謹會同署江南提督臣來英合詞恭摺具奏伏乞皇上聖鑒訓示謹奏道光二十八年七月二十九日奉硃批該部速議具奏欽此

奏請章練塘移駐文武官兵摺

奏爲章練塘地處阨要請移駐文武官兵以資巡緝恭摺奏祈聖鑒事竊照蘇州松江二府交界地方湖河錯雜港汊紛歧匪徒最易出沒中有章練塘鎮係元和吳江青浦三縣接

壤之區切近泖湖接連澱山湖處處可通舟楫尤爲盜賊淵藪前因盜犯顧雙僖等盤踞該處肆行劫搶蔓延蘇松二府各屬民商頗受其害經前任督撫臣嚴挈重辦而自該處至元和等縣城地計一百二十里至二十六里不等卽分管泖地之縣丞巡檢等官駐紮處所亦離該鎮自七十里至三十餘里不等是文職印捕各官皆有鞭長莫及之勢至武職向隸提標前營管轄額設把總外委各一員兵丁六十八名分防九汎實在駐守章練塘者僅止把總一員兵丁五名相離該營遊擊守備駐紮處所亦有三十六里聲勢既不聯絡於彈壓巡防均難得力臣等與提臣尤渤往返函商並飭藩臬兩司遴委幹員會同蘇松兩府一再查勘採訪輿論僉稱章練塘鎮實爲蘇松二府要隘必得移駐文武官兵巡邏稽查